

27 OCTOMBRIE

RUGACIUNEA

SF. CNEAZ

ANDREI DE LA SMOLENSK

МОЛИТВА

О, преизрядный и дивный в чудесех, прославляемый от Бога в небеси, делателю Христова винограда, жителю вышняго Сиона, предустроеннаго града Иерусалима! Святых ангел присная радость и человеком дивная благодать, пречудных и дивных небесных селений быв желатель, а ныне со всеми святыми тех еси совосприятель. Аще естеством ты, святе княже Андрее, и был еси человек, но усердно в подвизах потщався и получил нескончаемый будущий век. Странен и пришлец на земли был еси, того ради получил житие в небеси. Оставив отечество земное и тленное, восприял еси нетленное и вечное. Сугубо тя Господь Бог увенча и чудес тебе дар дарова, еже на земли недуги исцеляти и приходящим к тебе с верою милостивно присещати: прояви бо тя нам Господь Бог милосердый, яко отец к болящим чадам благосердый. Сего ради мили ся деем,

предстояще пред твоей многоцелебной иконой просити и молити тя недоумеем, да покрыеши нас грешных твоим предивным покровом, не от злата и серебра истканным, но от Бога ти в благодати поданным. Предстоим умильно пред твоей иконой со страхом, осквернившийся во гресе всяком, сего ради слезы проливаем и умильно к тебе взываем: помилуй нас, о святыи и дивный благоверный великий княже Андрее, подаждь нам руку помощи и Божия милости. Ходатая тя к Богу предлагаем, от Негоже нам помощи желаем, вемы бо тя неложна раба Божия: избави нас от всякаго навета вражия. Буди о нас милостивый защититель и от болезней наших скор исцелитель. Свободи от руки чуждаго и от всякаго прилога злаго. Многими бедами есмы обстоими, всеми злыми скорбьми сокрушеннии, к дверем смертным от скорби снидохом, и Бога грехами прогневахом, и от себе Его удалихом. Сего ради буди нам вождь и заступник, ходатай и защитник, ко Господу нашему Иисусу Христу и к Его милосердому Отцу и Святому Духу, в триех ипостасех единому Богу, да получим мы грешнии грехов прощение и от Него милость многу. Буди же ходатай и молитвенник теплый о стране нашей Российстей, споборник и заступник всему христолюбивому воинству на вся неправославныя и крестоненавистныя,

злочестивыя и иноплеменные враги и супостаты, да память их злочестивыя веры да потребится, храбрость же и сила и грады да разрушатся. Русскую же нашу страну не забуди, но присно на ню призирай, и всякаго изобилия плодов земных подати Бога умолай, и всем призывающим тя с верою во всяких скорбех, болезнех и напастех буди вспомогатель и скор исцелитель. Даруй же нам здравие неоскудно и молящимся тебе помощь неослабну, благодатию и щедротами и человеколюбием Господа Бога и Спаса нашего Иисуса Христа, Ему же от нас буди слава и держава, ныне и во вся веки нескончаемых веков. Аминь.